

In'expoziziun gronda cun Marina Lutz

Il Forum Zugerland mussa l'artista sursilvana

■ (anr/vi) **Gia cun 27 onns ha Marina Lutz sia emprima expoziziun singula. Ils 28 d'avust è vernissascha en il Forum Zugerland a Steinhausen sper Zug. Ins po contemplar picturas surrealas, cuntradas contemporanas e sculpturas da lain.** L'artista na porschia betg mo insatge per l'egl, mabain era per l'ureglia, scrivan ils organisaturs. «Senza musica fiss jau mo a mesas in carstgaun, perquai dovra mes art era musica», di Lutz. Aposta per l'expoziziun ha *Nicholas Stücklin* cumponì in toc. Tuns da la natira, vent, plievgia, ma era suns da ghitarra e dad instruments electronics rinforzan l'atmosfera ch'ils maletgs derasan.

«Land Escapes» – art democratic

Il titel da l'expoziziun «Land Escapes» signifitgescha «scappar da la champagna» e fa endament il pled englais per «cuntrada». Cun ils maletgs da cuntradas da la California stat Lutz en cuntrast a l'opiniun actuala che l'art haja da consistier d'installaziuns concepziunalas che mo experts chapeschan. «Mintgin che s'interessescha duai avair access a l'art», di Lutz che pleda per ina chapientscha democratica da l'art.

Per in'artista da 27 onns ha Lutz gia stgaffi ina ovra fitg vasta, scriva il Forum

Zugerland. En l'expoziziun pon ins contemplar 40 picturas surrealas, maletgs da

cuntradas sco era sculpturas da lain cubisticas che persvadan entras colurs fer-

mas, cumposiziuns intelligentas, comica e finezza.



Marina Lutz da Rabiús e Lucerna avant ses maletg da la seria «Tartar».

Illustratura e cartoonista

Marina Lutz è creschida si a Rabiús ed ha finì il 2012 cun il bachelor sia scolaiziun d'illustratura a la scol'auta a Lucerna. Ussa lavura ella sco artista libra ed illustratura.

Sias lavurs ha ella mussà gia dapertut en Svizra. Ina giada l'emna cumparan ses cartoons politics en il «Bündner Tagblatt». Ina da sias picturas è vegnida tshernida per il bajetg da la Banca Raiffaisen Surselva. Sias illustraziuns chattan ins sin covers da dc's da musichers internaziunals. La fin settember sa preschenta Lutz er a l'expoziziun dad «Art Copenhagen».

En in center da cumpra

En il Forum Zugerland mussa Migros-Kulturprozent artists ed artistas etablids e dat a talents giuvens la pussaivladad dad ir en la publicitad. Il Forum Zugerland sa chatta en in center da cumpra. Uschia vegn l'art integrà en la vita dal mintgadi ed in e scadin po visitar a moda spontana in'expoziziun.

La vernissascha cumenza ils 28 d'avust a las 19.00. L'expoziziun dura enfin ils 10 d'october. L'artista pon ins inscuntrar en il local d'expoziziun ils 11 da settember, ils 25 da settember ed ils 9 d'october mintgamai da las 18.00 fin 21.00.